

摘藻堂四庫全書薈要

集部

欽定四庫全書薈要

集部

武溪集卷六

四至

詳校官助教臣常循



欽定四庫全書薈要卷一萬四千二百五十九


集部

武溪集卷四

宋 余靖 撰

論

堯舜非謚論

 堯舜五帝德規百王者有堯舜焉言常道尼父首之於

書大一統馬遷列之為紀釋者云堯舜謚也翼善傳聖
曰堯仁聖盛明曰舜後之學者罔不宗焉愚嘗考世系
之端辨質文之變頗疑是說請試明之粵自邃古聖人

迭興真淳乍散制度未備尊廬赫胥以前未有氏姓皆以教民之事而名之鑽燧改火則曰燧人穴處巢居則曰有巢是也迨及三皇頗推五勝乘火德者曰炎帝應土運者曰黃帝少昊金天亦襲其故迭觀興廢漸有兵戰自顓頊以來天下之號則因其名顓頊與嚳則其名也帝摯帝堯帝舜亦其名也以國言之則顓頊稱高陽氏帝嚳稱高辛氏帝堯稱陶唐氏帝舜稱有虞氏皆以所興之地為國號也帝摯非改姓易代之主故不稱氏

以名言之則顓頊譽摯堯舜皆名也項正也譽極也摯
大也堯高也舜華也古雖敦朴知以美字為稱固不疑
矣夫諡法者著於周公蓋三代之際世有僻王嗜音酣
酒者有之荒禽冒色者有之飾非懷諫者有之剖忠害
賢者有之欲使聞美號而知勸見惡諡而思懼垂易名
之典為觀行之則此周公之制也豈以周制而逆觀堯
舜之世耶且堯之典曰有鰥在下曰虞舜當羣臣舉善
之初釐降試難之善未顯賓門納麓之功未著安有對

萬乘而不稱其名在側陋而先定其諡哉斯固知其不然也明矣釋者又云受禪成功曰禹豈舜受堯禪而不能成功乎夏商之王以名為號者多矣仲康太甲之類是也禹之保邦莫非堯舜之制而加以繁文縟禮烏有捨誠勸而就質畧哉若以夏道尚質則禹非夏耶愚謂周公之著諡法也特取堯舜禹湯之名以為訓解將後之下武守文者慕其名而襲其行也周人以諱事神諱其名而稱其諡者周道也諡興於周為得彌文之實

漢武不宜稱宗論

創帝基革天命濟率土於塗炭者祖之盛恢聲教同文軌納蒸民於富壽者宗之最存則詠其德沒則觀其謚所以叙昭穆於百世之下配禘郊於羣廟之上親雖盡而不毀者祖宗之隆也昔武皇之撫運紹炎漢之重熙拓蠻夷之境則衛青去病之勲立而民疲於干戈矣惑神仙之談則少翁欒大之寵崇而吏煩於祠祀矣悅韓嫣之佞而處以副車則君臣之位失矣信江充之譖而

誅及戾園則父子之恩絕矣舉其大槩何昏如之至于
即世之日羣臣加謚曾不為靈若厲而反壯其武廟為
世宗虧周公之法敗三王之制當時洪儒碩生如夏侯
勝黃次公議其樂章遽抵詔獄不亦甚乎且祖有功宗
有德若夏之少康商之太戊武丁皆廢而復興不失舊
物然後始謂之宗也周人自文武而下雖德如成康刑
措不用宣王中興姬道再盛廟在迭毀亦無異號暨乎
漢室高帝以英武特起繼嬰及籍戴之曰祖斯固宜矣

孝文崇仁義省刑罰弭兵革服節儉而囹圄空虛寓內
太平廟稱太宗斯又宜矣孝武雖廓地斥境而亡德及
民不加惡謚固亦幸矣尊之為宗無乃失其正乎或曰
孝武雄才遠畧高出百王西開夜郎之境東建朝鮮之
郡匈奴徙庭甌越請吏脩典禮嚮儒學登封告威而漢
之制度於是乎備若如所論不亦過乎曰邦土雖闢兵
已黷矣遠夷雖服民已耗矣樂府雖盛雅亦亂矣泰山
雖封制亦侈矣文景之俗由是而憊可勝道哉末年下

哀痛之詔進筦榷之術有富民之心而不能得其道也
世謂漢家雜以霸道愚於武帝觀之曾霸者之不及代
廟弗毀後嗣何以觀乎西漢稱宗者四而東漢無復區
別至于安桓亦有廟號其失自武帝始故著論云

秦論上

前世高論咸以河山之險秦得百二遂并天下者地勢
便利使之然也所以奉春進計田肯建言著之史牘千
古稱善愚謂秦人之興有由然矣自伯翳至於秦仲率

以立功克守其業而僻在岐雍諸侯以夷狄畜之穆公
之世得人而昌廣地開國悉由任賢之勲矣百里奚亡
虞之臣也而授以國政孟明奔軍之將也而委以師律
引咎自責卒復河西之地由余在戎公以為憂當其來
聘也降千乘之尊接以殊禮坐則曲席食則傳器及其
來歸以客卿待之故能益國十二闢地千里遂霸西戎
而抗衡中國矣暨乎即世之日三良殉葬國人哀之賦
以黃鳥秦人不復東征數世不競者奪其善人故也及

孝公嗣守宗祊七雄並立當是時齊威楚宣魏惠燕悼
悉已稱王韓哀趙成亦復強大諸侯力政而周室卑矣
孝公增脩穆公之德寤寐賢者列爵而尊之分土而與
之衛鞅以孽公子求見遂用其謀開阡陌急耕戰法行
民便亦以稱霸後世遵用先軌范雎蔡澤離䟽釋蹻而
取卿相任賢之術速於置郵卒能滅二周吞六國而并
天下者用此術也且蘇秦反復之臣燕王一聽其言合
從山東秦人不敢窺函谷者十五年以此思之一賢之

功堅於山河遠矣在用與不用耳湯以亳武王以鎬而王天下其政何如哉百二之說於是為負

秦論下

世言秦所以亡者趙高讒邪胡亥蔽愚毒痛齊民四海瓦解而宗社墟矣愚嘗以為亡秦而賊天下者李斯也秦人據形便之國氣凌山東穆公任由余孝公用商鞅而霸業基矣蠶食虎視累世橫騖有起剪恬驚握其兵穰魏睢澤執其政斥地滅敵日加其強李斯始以儒學

西將於秦乃進一六合兼諸侯之說秦人除逐客之令以從其計破縱擅橫卒并天下以斯為相且斯以布衣徒步游說數年而取宰相不為不遇也海內既一屬心於斯六國厭戰爭之苦兵待我乎偃秦人困廬井之廢土待我乎闢父子薄耰鋤之異民待我乎教斯學帝王之術居輔弼之地脫或戴其君於成康之列躋其民於仁壽之域如反掌耳而乃背戾古始拔本塞源燔棄詩書愚弄黔首絕尺寸之封以孤其勢侈封禪之制以驕

其心築宮彌山川勒銘徧海內戮誹謗禁偶語刑繁令
淫國紀隳矣紀綱既隳四國不危者未之有也世子者
所以接統而著代君行則守有守則從古之制也故曰
太子天下之本本根一搖天下必蕩安有著名儲貳而
握兵邊徼廢弦誦之大業習鼓旗之末節衣裳顛倒莫
甚於茲默而不言焉用彼相及沙丘之變趙高以褻近
之資啟亡國之言丞相當於此時正人臣無將之誅以
視天下召扶蘇而立之從先帝之約扶蘇仁明備嘗險

阻輔以治道可致太平若剗去嚴刑罷遣謫戍民無怨
讟則秦之社稷未可量也斯惑趙高之詞越錄而拔胡
亥小人在位兵徭並起使四海之人血膏邊城骨填驪
山比屋罄罄半為盜賊尚乃建言督責以固恩寵豈不
愚哉賊屠三川卒被高譖黃犬之歎得無晚乎使胡亥
得位趙高得權皆斯之由也倒持太阿授人以柄斯之
謂乎故曰亡秦而賊天下者斯之罪也卒被五刑非不
幸矣

漢論上

史氏以孝成委政外家祿去王室哀平二帝享年不永
賊莽乘之盜竊神器漢祚中絕者孝成始之也竊謂漢
家之禍不始於孝成蓋孝惠源之陳平者決而泄之使
其橫流不已彌漫于景武宣元之際孝成復敗其隄防
而極於昏墊也昔者高皇帝逐秦鹿而得之英雄樂推
遂正宸極后族呂氏侯者三人奉朝請食租賦而已賞
刑大議未嘗及之孝惠即祚植性仁弱呂后殺三趙王

號令自出惠帝不能以新造之漢正亡窮之法定君臣之分專生殺之柄而乃感人彘之酷意不久生自促壽命以成高后之勢不曰孝惠源之乎高祖之約非劉氏不王非功臣不侯彼陳平者用辟彊率爾之辯尊王諸呂分將南北軍中宮稱制以臨天下當是之時向無周勃朱虛之謀齊楚諸侯之兵使祿產體不近下一有羿浞之材則漢之社稷幾為他姓所得矣不曰決而泄之使其橫流不已乎厥後魏其侯以竇后兄子武安侯以

王后異父同母之弟並託肺腑繼為丞相孝武最稱英
明而田蚡為相權移主上上曰君除吏盡未吾亦欲除
吏此蓋近中宮之勢而用之內積憤懣而宣於言也衛青
霍去病雖以軍功取大位然亦因椒房之重孝昭之時
上官桀父子霍媼之謀幾傾漢室皆帷廡之親也許史
丁傳之家印纍纍綬若若分茅土握符節秉鈞軸乘朱
輪華轂而朝者不可勝數不曰瀰漫於景武宣元之際
乎漢之鼎所以不移者賴忠賢之士間而持之耳及孝

成之在位也趙氏姊弟專寵賊害皇子王氏五將世權
外擅國命故莽因元后之勢席諸父之基肆其姦險以
取名器復緣哀平短祚國統三絕張禹師丹之輩諂諛
邪佞故取宗室幼稚未能持國者授之以令天下使漢
祚中缺者職此之由也不曰敗其隄防而極於昏墊乎
西漢之禍於是乎在

漢論下

前史稱光武中興再造漢室戮新都驅赤眉應四七之

生賞謀臣酬戰功得萬世之利以為胙土錫壤不侈其
封域帶河礪山克保其胄嗣因謂高祖創漢基剗秦制
封宗子王異姓或連城數十或裂地千里兵足以張其
威權賦足以充其嗜欲故韓彭英盧身陷菹醢後世史
學罔不推論咸曰高帝之封也地廣力强所以速叛光
武之封也國小勢弱所以易寧於是謂高帝之策為非
而光武之謀為得愚雖不敏嘗謂不然何則賞元勲誅
大憝者法也順世機息民患者時也聖人立法先乎順

時堯授舜舜授禹湯放桀武王伐紂時也秦并六國蠶食天下尺土寸戈不在他姓一夫奮臂四方瓦解豈封建之罪乎高祖以巴蜀僻左返攻三秦東戰滎陽與項為敵當此之時叛王驕將爭逐秦鹿者衆矣陔下之後子房請捐山東之地以與功臣楚乃可滅夫言捐之者非漢之有也且陳餘於項氏無纖芥之勞環封三縣尚怨項籍况韓彭者名雖君臣勢等隣敵不設重餌其誰肯來豈能以區區侯爵制其去就哉安可比吳鄧輩強

邑數四而已耶及世祖之興也出自宗室翦除凶醜以順制逆以仁抑亂因思漢之民成復漢之業先帝馭臣之與奪得以增損前世建侯之利病得以沿革於是限其土守削其兵衛足以奉其身而酬其勲杜震主之權大使指之臂終能全其首領不陷刑戮者斯亦可制之時矣使高光易地而居勢不可奪禮曰時為大順次之其此之謂乎必若美世祖之權則可矣若又短高帝之失策則非觀時之術也

正瑞論

夫上古明王言為天下法動為後世則猶恐怠惰故立左右史以規之是則史之設所以謹言行於一人正褒貶于千古不獨紀歲月辦赴告而已矣三皇墳五帝典記言之史也楚檮杌魯春秋記事之史也訓誥誓命之詞得失存亡之跡發簡可見未聞祥瑞之言焉迨於兩漢則有赤芝白鴈醴泉甘露卿雲寶鼎之應豈古史闕畧而後世該備乎盖有司失為史之本意也何也國之

興也在乎德不在乎瑞國之亡也在乎亂不在乎妖故
堯以敷九族和萬邦而興舜以舉十六相去四凶則又
興禹以平水土興湯以行仁政興周人以積德累仁興
夫是者雖無祥瑞可不謂聖且治乎癸以侈奢亡辛以
暴虐亡厲王以聚斂亡幽王以女色亡夫是者雖無妖
異可不謂昏且亂乎桑穀生朝高宗復商熒惑守心景
公安宋此則明君在上妖不為害矣魯獲麒麟哀公出
奔漢鳴鳳凰平帝失國此則闇主在上瑞不為美矣仲

尼筆削春秋書日蝕星隕地震山隕蟪生鵙飛之變者
非廣乎異聞也蓋欲人君責躬修德見災思懼而臻於
治也特於篇末因麟之無應以明述作之意耳其他瑞
則無聞焉鶴舞晉庭龍見洊水不由德至斥而弗書若
是之比求名而亡則聖人微旨可見矣子長孟堅推論
怪譎其啟國也以斬蛇大澤為受命之符而英雄之畧
棄矣其定制度也以龍見成紀為易服之感而古人之
象隳矣及乎蔚宗患其失實則云某郡上言某瑞以示

微意與其疑而列之曷若正而削之之為愈乎今之郡縣
時報祥瑞以為紀事之瑞累謂非良直之法也必若德
施於民效易其俗賞不僭刑不濫則四靈為畜日遊於
君之宮治郊藪矣又何用索異傳怪惑天下之耳目哉
苟薦紳者默而不言則示之後嗣得無懼乎

姚疇論

古者天子之立史官也不獨紀歲月遠近辨朝會同異
而已矣蓋以王者居億兆之上喜任陽春怒如雷霆予

奪生殺無不從也故立史以謹其言行動則左史書之言則右史書之以示後嗣欲其畏後世之名而不敢過舉者也竊見兩漢而下唐制度最為近古而史官廢置未臻大中敢試論之唐之脩史其術有二武德故事小省之官更直近陞執筆對仗隨而撰錄書之方冊謂之起居注姚疇建議秉鈞之臣訐謨便殿嘉猷善經退必編次送之史館謂之時政記於是周官六史之職不復甄叙矣累代著作之局不復刊修矣疇議既行而起居

之官立於外朝仗退之後跡便疎遠雖延英數刻之對
聖人雖有泣辜解網之言應機成務之謀不可得而聞
也若非宰臣撰述則軍國政要何由知之繇是而言有
不可者三焉古者帝王不得見當代之史何則史之為
書不隱惡不虛美謂之實錄史而可見則其臣不敢以
實書書而不實為已錄矣實而不諱為已戮矣不得見
史者以此也宰臣監修是使自司其過也其不可者一
也昔者成王尚幼與唐叔戲剪桐葉而與之曰以是封

汝明日太史上輿地圖請封唐叔自是成王終身無戲言夫是則史官常在左右也今史臣隨仗出入則是用史臣于頃刻之間耳戲言過行尚奚史之畏哉其不可者二也古者大臣不掌註記故董狐得以直筆於晉庭南史氏得以執簡于齊設有史官外朝既罷則目不見帝王之容耳不聞帝王之聲近臣奏對孰邪孰正孰諛孰諍咸莫之辨也用他人註記為己之筆削夫是則史官失職莫甚如此其不可者三也語曰使廉士守藏不

如扃鑰之固也使義士分財不如投鉤之平也何則有
情之與無情也夫以廣淵之謀居弼亮之位緝熙庶績
裁成萬機而復代史臣之撰述固亦勞矣向使房杜姚
宋擊軌轂而自序策畧人猶疑之脫不幸而有元載盧
杞當其任則安所取信哉太宗文皇帝貞觀中所論政
體皆可冠冕古今粉澤王度著在方冊照然可覩者史
臣得侍於內朝故也姚疇雖知註記之詳未知先王立
史之義一失其源而莫之敢議惜哉

三統論

夫王者受命必先改正朔易服色者蓋示民之有初也
故三統之義於是彰焉然而先儒論止及三王之世是
以夏之寅而黑商之丑而白周之子而赤可得而述也
至于堯舜而上則雖仲尼之說亦無聞焉豈非旨深而
意遠乎而漢鄭康成之徒則據此而逆推以為舜與周
同堯與商同高辛氏乃與夏同正朔三而止文質再而
復自古而然也非但不經抑亦于帝王之道有所昧焉

嘗試論之夫帝王步驟不同文質亦異三皇正厯歲准
攝提古之為君因民而治故唐虞以上無變易逮夏后
之繼統也自以德衰不及二帝又知夫時將醜矣必示
之以制度故其沿革頗漸於文是以小正之說尚黑之
義於是著焉然而服色有所尚而正朔不必改也但紀
之於政令而已故仲尼稱述三代則曰行夏之時蓋以
其合於古而得天數也禮因於虞而不言其所損益者
蓋謂此乎及湯武之革命既以兵勝俗又寢弊欲示民

以改作而新其耳目俾知夫令出諸已故有服色之變
又以服色之制本象於正朔商人以建丑而易寅新其
令也尚白而變黑象其朔也周之尚赤而建子由是興
然三王之易服改正必取三微之月蓋以君之出令象
歲功陽氣之始也足以垂訓於百王文質制度於斯備
矣後王雖興制作不出於此也故仲尼曰其或繼周者
百世可知其此之謂矣夫謂正朔三而止者月過三微
不可以垂法也斯亦王者之制耳安可及於上古哉且

五帝之書二典存焉其堯之書則曰敬授人時順厯數也又曰日中星鳥以正仲春日短星昴以正仲冬此則分至之候正在四仲契古厯而符夏正也又烏聞建丑之說乎舜在璿璣以齊七政審己之德當天心與不爾至於厯數亦不異於堯又曷覩建子之言乎及其制服則曰觀古人之象故山龍日月之數較然可知也又何服色之改乎然則五帝之德淳三王之俗薄德淳則制簡俗薄則政備故三統之義起於三代而自太昊或推

五德之運者蓋順天之數也正朔則無所更焉至三王則政有偏矣夫有偏則有弊故後之興者必舉其偏而救其弊也若謂文質可推於上古是則夏尚忠商尚質周尚文此三正者又何行於帝王之代乎斯見其不然也自秦漢以下服色但依於五勝此又不可推於三王亦明矣康成既已失之而杜佑孔穎達之徒復引為證疑誤後學甚矣夫

禘郊論

先儒之所以解經者蓋欲導前聖之淵源啟後學之鈐
鍵也援古有據垂世不惑者也祭祀之儀國之大典今
之禮經以鄭注為正而康成釋禘祭之文前後駁雜大
傳曰禮不王不禘王者禘其祖之所自出鄭云謂祭感
生帝於南郊也祭法曰有虞氏禘黃帝而郊嚳祖顓頊
而宗堯鄭云禘謂祭昊天於圜丘也祭上帝於南郊曰
郊祭五帝五神於明堂曰祖宗皆謂祭祀以配食也觀
鄭所釋似有未悟嘗試論之夫禘者宗廟大祭之名也

王者禘其祖之所自出謂虞氏之祖出自黃帝不立廟
祧故五年盛祭則及之夏亦禘黃帝商周禘嚳蓋姓氏
所出是為遠祖也諸侯之禘則降於王者止祭始封之
君不得禘姓氏所出之祖故曰諸侯及其太祖是也而
鄭謂太微五帝遞王而王者之興必感其一因其所感
別祭以尊之故以感生之帝祭於圜丘而祀上帝於南
郊唯據緯書以釋經義太微亦為星象昊天亦謂北辰
蒼穹之號遂有六天郊丘之名分為二祀斯皆舛謬深

用軫惜何則郊與園丘俱是祭天之所王肅所謂猶王
城之內與京師異名而同處也豈可郊丘分為二祀祖
宗合為一祭乎康成俱以禘文在郊祭之前其祀必尊
當為園丘皆罔研經意肆其臆說耳又以祖宗五帝五
神於明堂小德配寡大德配衆鄭之此說殊為失旨誤
取孝經宗祀之名以解祖宗之義乃以二主泛配五帝
若謂太微五帝耶則鄭說太微與昊天上帝為六天矣
天尚無二安得有六按天官書太微宮有五帝者自是

五精之神不在穹蒼之例若以為太昊炎帝之屬耶則又非仲尼配天之意也周禮曰王將旅上帝張氈案設皇邸祀五帝張大次由此言之上帝之與五帝自有差殊豈可混而為一乎古者祖有功而宗有德蓋若周人尊文武之功不毀其廟非謂配食明堂者也鄭引孝經而反違其旨惜哉漢承秦滅學之後遂使儒者進無經據康成最為明禮而於禘郊之義不能盡之故其釋祭法即云祀感生帝解大傳即云祭昊天箋周頌又云大

於四時之祭而小於祫注左傳稱郊配靈威仰箋商頌
又稱郊為祭天首尾紛拏自相矛盾孰為辨之哉

武溪集卷四

欽定四庫全書薈要卷一萬四千二百六十

集部

武溪集卷五

宋 余靖 撰

記

大宋平蠻碑

聖宋體天法道欽文聰武聖神孝德皇帝在宥之三十
一年天宇之內海渚之外旣裘卉服罔不率俾粵五月
蠻賊儂智高寇邕州陷其郭賊虐衣冠驅虜稚艾遂沿
鬱江東下所過郡縣素無壁壘倏然寇至吏民棄走因

得焚蕩剽鈔無所畏憚乃攻圍廣州五十餘日不克大掠其民而去然所存者官舍倉庫而已百年生聚異域珍玩掃地無遺矣國家於嶺南不宿重兵故賊起三月而後師集蔣階張忠素號驍將相繼覆沒由是畏懦者望風潰走賊鋒益熾逼連賀毀昭賓再穴于邕矣驛騎繼聞上甚憂之樞密副使狄公青以為將帥之任古難其才若再命偏裨事一不集則二廣之地禍連而不解矣亟自請行天子聽之遂改宣徽南院使荆湖南北路

宣撫使都大提舉廣南東西路經制盜賊事九月拜命
既授禁旅仍啟以舊鎮騎兵荆湖銳卒從行十二月至
桂林督部伍親金鼓然後兵知節制矣明年正月甲辰
至賓州先是鈴轄陳曙領步兵八千潰于崑崙之關公
推其罪首斬曙及佐吏已下三十一人然後人知賞罰
矣兵將股慄咸思用命是月已來引師至邕城一舍賊
悉其徒以逆戰公之行師雖倉卒道途皆有行列賊至
駐先鋒以接之公憑高望撫騎兵以翼焉賊徒大敗追

奔十五里斬首二千二百餘級生擒五百人尸甲如山
積于道路偽署將相死者五十七人是夕智高焚營自
遁復入于蠻中先是命湖南江西路安撫使樞密直學
士孫沔入內押班石全彬過嶺與廣西經畧使余靖同
其經制東西路賊盜故命公督大提舉然孫石贊謀而
軍中悉稟公之節制賊之再據邕也農者輟耕商者輟
行遠邇惶惶不聊其生及公之拜命也朝野之論中外
歡然以方召之才兼機軸之重出剪狂蠻無噍類矣賊

之巢穴曰廣源州交趾之附庸也父為交趾所戮遂棄其州奔南蠻界中淵藪悖傲以僭稱號自名其居曰雲南道又曰南天國再名其年曰景瑞曰啟歷雜名其左右之人自侍中開府已下署之其主謀者黃師宓儂廷侯儂志忠等戰沒於陣未有剪其羽翼而能飛剗其腹心而能全者也故宵遁矣嗚呼智高之謀十餘年間招納亡叛共圖舉事十餘月間連破十二郡所向無前夫豈自知破碎奔走在於頃刻之間乃知名將攻取真自

有體哉二月甲戌改乘轅其月丁亥至桂州詔徙護國
軍節度復以樞密副使召仍曲赦嶺南民得休息矣遂
磨桂林之崖石以書其勲其詞曰

有宋之大	天覆地載	四海正朔	百蠻冠帶
蠢茲狂寇	起乎徼外	父戮于交	逃死獠界
招納亡命	浸淫邊害	邊臣罔上	習尚以懈
卒陷邕鄩	乘流東邁	志圖全越	肆其蜂蠆
廣城言言	梯衝附焉	攻之五旬	掠民而旋

賊鋒一至 千里無烟 還據于邕 五嶺騷然

天生狄公 輔聖推忠 情存義烈 志嫉頑克

請纓即路 仗節臨戎 英材鱗集 猛將風從

賊之敢鬪 實惟天誘 來迓于郊 奄喪羣醜

當我摧鋒 易如拉朽 僭補偽署 叢然授首

羽翼既剪 心腹既剗 雖欲自舉 人誰與圖

焚廬而去 回巢以逋 六親不保 曰獻其俘

厥惟邕邊 南國之紀 九洞襟帶 列城唇齒

險固一失 兵糧無峙 庶民蚩蚩 鳥驚獸跂

我公之來 電掃雲開 叛渙斗破 網領重恢

師成廟筭 民得春臺 天聲遠振 繫公之材

大宋平蠻京觀誌

并序

大宋皇祐四年夏五月廣源州蠻犯邕管陷之乘江流
暴漲東陷九城遂至廣州廣人怯戰登陴自固賊得駐
兵傳城攻之五旬雲梯土山極肆其巧城堅不能下乃
還經途復殘二郡覆四將再入于邕凡害將佐三十餘

負虜生口萬計牛畜資寶無算所過焚蕩無餘楚越蕭
然矣朝廷憂之君臣為之旰食樞密副使狄公青抗章
請行願授成算上重其誠從之先是命樞密直學士孫
沔入內押班石全彬同本路經畧使余靖經制賊盜命
青以宣徽使都大提舉總其節制明年正月己未青帥
三將兵至邕州歸仁鋪賊舉衆出城拒戰大敗之騎兵
追奔十五里所殺蠻衆二千二百餘人偽署侍郎黃師
宓等腹心將領五十七人死于陣賊首儂智高其夜焚

城自遁詰朝引兵入城俾供奉官賈榮就戰場斂賊尸而殮之為塚于歸仁之南又遣郴縣尉區有鄰聚重傷還城而死并活擒而戮及奔而蹂踐燔灼者復三千二百二十八人為一塚瘞之于城之北二月有詔即其築為京觀乃命立石以誌其伐銘曰

庸臣司邊 率職不虔 盜起其間 蠢爾異類

藏亡納叛 以輔狡煩 窺茲無備 乘虛襲怠

遂肆克姦 順流而東 列城皆空 嶺表騷然

師徒桓桓 矢勁摧完 天下惻焉 帝命樞臣
握節屬鞬 拯墜綏殘 師行之律 賞罰貴必
其謀乃專 兵家之勢 動靜有制 所擊無堅
吁嗟羣醜 狃於常勝 敢當其前 驅彼犬羊
敵此熊羆 血膏于原 棄甲如山 遺骸亘野
百里腥羶 武功外揚 仁心內憫 念及幽泉
肩髀之葬 京觀之封 銅柱齊年 天聲遠振
皇澤重宣 永鎮羣蠻

韶州新置永通監記

古之建國者義以制事材以聚人八政之先曰食與貨
即山鼓鑄三代而然禹鑄厯山之金以禦水禍湯造莊
山之幣以拯旱虐周以金錫之利分隸虞衡唐以郴桂
之郡並建鑪冶貨之所產本無定處興造之謀期於便
事而已國家平一諸夏寵綏四海開寶興國之際收復
江閩因其故區作為泉布時移歲積地產靡常比年已
來治民幾廢焉今天子嗣位之二十七年特詔翰林學

士葉公清臣宋公祁經度山澤之禁以資國用乃僉作
奏曰謹校郡國產銅和市之數惟韶為多而莫處嶺阨
由江淮資本錢以酬其直實為迥遠謂宜即韶置監分
遣金工以往模之歲用銅百萬斤可得成幣三百萬三
分其一以上供餘復市銅幾得二百萬如是則其息無
窮矣詔下其議於廣東于時轉運使直太史傅公某知
韶州比曹副郎藥公某協恭承詔以經厥始郡有故堞
號為西州遺趾高平宛出郭外乃相厥土墨則食焉凡

棟宇之制管庫之嚴詢于故實斷以心匠模沙冶金分
作有八刀錯水鑿離局為二並列關鑰互有隄防當其
中扃控以廳事誰何警察目無逃形其鉉錯之備用薪
炭之蕪蓄別藏異室布于兩序出內謹密前為大閤冶
官列署于閤之南羣工屯營于垣之外市材于山市甃于
陶雇工于巧凡手指之勤筋力之用率平價而與之金
不發帑貲不徭民籍而功用成為屋八百楹最材竹鐵
石陶旒之用一百四十萬惟材木六千資于連山釘口

十萬出自真陽餘悉辦于韶之境而民不知役乃知循
良之政誠自有體哉以皇祐元年龍集己丑三月甲午
始築其基而飭其材八月辛酉棟宇完範鎔備物有區
工有居九月己亥大合樂以落之董舊巧募新習勗怠
勵情授以程準日課千緡不愆于素初郡之銅山五歲
共市七萬前太守潘君一歲市百萬及藥公繼之乃市
三百萬明年又差倍之歲運羨銅三百萬以贍嶺北諸
治苟非主計者通其神提綱者揚其職守土者宣其力

則何以協規弼模成効之速如是哉且韶被山帶海雜
產五金四方之人棄農畝持兵器慕利而至者不下十
萬窮則公剽怒則私鬪輕生抵禁亡所忌憚緩其羈紲
則鷹摯而陸梁急其銜勒則獸駭而跼齧故境壤雖狹
而獄犴冠抄常倍他境必資威肅惠和兼被于物乃成
善政觀此圖功賦事精至詳簡則民之受賜其可知矣
初以遠方置監議者不一故朝廷有以待之明年四月
乃下敕賜名永通時天子親享明堂之歲五月記

海州社稷壇記

古之言社稷者其尊與宗廟等諸侯始封授以茅土歸其國而立社上以尊天子之命下以教民美報也漢制郡縣置社太守令長侍祠牲用羊著于祠令則知郡國雖異而祀事無改春求秋賽未之廢也東海郡社稷舊壇藐在孤山之麓地形險迫儀度草畧素亡壇壝高卑之式絕無畛域外內之限牛羊所踐芻牧弗禁慢神瀆禮闕莫甚焉范陽祖君擇之慶厯戊子由蘭臺丞佩郡

印既下車之三月以為羣神之在祀典者衆矣惟社稷
得用籩豆奠饗幣以脩萬民之報而祠所弗嚴何以示
教乃相美土改而築之去舊趾五十步得平壤焉廣輪
數畝命以官田易之封土為壇陞降有陛襲今據古一
本於禮樹以所宜之木敞以門墻奉祠執事者齋有宮
侍有次又閱章聖皇帝所頒崇器制度未如制者咸俾
新之於是政禮具舉人祗交感風雨以時田穀順成秋
八月行事於新壇以報神福民心熙熙覲盛儀而樂嘉

應也於戲擇之以通材遠識屈在外補觀其臨民賦政
先於典禮得古君子之風焉脩淫祀以求庇者得不愧
乎督役者朐山令李良輔云

同遊泐溪石室記

人之跂高慕遠樂在林壑者厥遊不得其勝則無所記
焉地之蘊靈蓄秀於方域者所賞不遇其人則無所發
焉遊賞之會其難乎哉予以分司歸韶之明年江夏黃
君子京始宰樂昌其明年以書見遺曰弊邑雖小地多

勝槩泐溪石室宜為稱首元和中番禺從事李文孺嘗
誌其遊惜其景出涵暉之右而文不逮於到難故使茲
山不甚顯聞於世若迂高車以辱臨之願去道弗蠟履
以從又明年乃往遊焉其始去縣郭西北平行五里而
近西為大山其厚無極東亘高阜積石所成澄溪下流
人迹中斷揭溪即阜屬當大窾外若敞扉中如華屋平
有度筵之席高逾結棟之隆穹中四注屏舒玉削幽崖
婉入如曲房小檻之容斜竇旁通有連甍接廡之勢雲

蒸霧積閉陰闢陽冬漏暖脈夏含淒氣天地炎涼所不能制固仙遊之所宅岳棲之嘉致也既而徧覽幽趣庶逢前軌洗塵而視則有陸羽題名墨迹在焉張炬而入則有六祖偃息石牀存焉嗚呼苟非子京奏刀恢恢之暇以竒勝見招何由崎嶇百里一屆其域及窺陳迹則古之賢拮寢處為常乃知世稱今人不如古宜哉子京時又招攝尉唐某進士譚某同遊既書名于壁復鐫石以誌之今天子親享明堂之歲三月二十五日記

韶亭記

賢人君子樂夫佳山秀水者蓋將寓閒曠之目託高遠之思滌蕩煩絀開納和粹故遠則攀蘿拂雲以躋乎杳冥近則築土飭材以寄乎觀望惟韶山去州治八十里自元精胚胎陽結陰流不知鑪錘者誰獨秀茲境在昔虞舜南狩蒼梧九韶之樂奏于石上山之得名起於是矣國家丕冒海隅擇材綏遠殿省丞潘君伯恭特膺詔選來守嶺阨鋤強構弱有意於古下車暮年人用休息

乃曰山為州鎮厥名尤著自秦開五嶺迄今千載憑軾
之使泛舟之賓大麓之下往還如織不知觀矚之地以
為山榮豈守土者詳近而畧遠哉遂按郡牒而相之背
山東渡五里而近得地曰靈溪即道左建亭而山之奇
秀森然在目矣倂來以圖授之矩畫先是賜紫僧法崇
者推誠導募衆所欽信嘗於康衢構榭以壯州邦既勤
基締將責髹黼太守曰吾以敦朴化人無事於侈可去
華就實移其用於茲亭崇曰明使君之言非唯集事

兼存為政之體繇是捨飾畫之浮費市梗梓之美材持
畚築運斧斤者子來而樂成矣越再朏魄而亭就則茲
山具美纖芥無隱屹者如闕闌者如庾平者如臺呀者
如谷向者如鬬背者如逃人立鳥跂霞明霧暗碧玉千
仞青螺萬疊殊形詭制紛不可名驅鬼投物巧不能備
信塵外之絕區也既而請名太守曰亭以山構而能盡
山之美其名韶云歲月日記

湧泉亭記

嶠南溪山之勝曲江稱最然其絕境多在遠郊徙州治以跨二江百餘載矣亭榭池館面高臨深前牕後續不逾雉堞耳目所詣不為難能尚書外郎杜君挺之之為守也獄無冤私賦役以時事舉條領民用休息近鄂勝槩亡不周覽梁濟真水越一長亭得湧泉焉始其出喧囂入杳靄層巒曲澗嵐碧相照澗極崖平泉源在焉橫崗屈盤隱若伏獸疏窪為沼泉出石罅大若濤湧細如鼎沸久旱不竭經冬常滿南方瘴暑酷如煥焚暫息泉

上寒慄毛骨挺之乘間一來吟酌永日自非嘉賓無預
茲賞傍有精廬因泉得名於是知事僧謀於衆曰古之
君子必觀於水盖有道焉習氏之名千載若存盖有遇
焉今太守適意水石而露坐泉傍雖曠淡自適豈吾人
之所安也乃募金伐材構亭泉心貫之飛梁虹橫波際
翼以堂室備賓遊之憩外營碓磴為民事之觀挺之暇
則造焉以滌煩慮既罷郡歸闕且半歲某與後太守潘
伯恭南康倅李仲求共陟泉亭一飯一啜不同於俗

皆當

時之乃書名屋壁以誌其遊後一月又書亭之始以寓

事仲求請模石而書之因歎曰韶處嶺阨雜產五金四方
之民聚而遊手牒訴紛拏稱倍他郡挺之以誠應物庭
無留事日自適於山水間乃知為政自有體也斯遊斯
景書之其無愧挺之名且伯恭名夙仲求名定慶厯七
年五月日記

韶州新脩望京樓記

廣之旁郡一十五韶最大在楚為邊邑在越為交衢治

城居武水東真水西

古名虎溪唐諱虎字曰武

境歷騎田大庭二嶺

故地最善而名著均之遠官得名城暨善地故其擇守
於等夷閱人最賢唐漢之西都也由湘衡而得騎田故
武水最要今天子都大梁浮江淮而得大庾故真水最
便騎田雖乘駟舊途而王官往來太平水道是以風亭
水館高臺上舍徙在真水不視溪山巧拙而偏診左臂
者勢使之然耳今郡守河內常公承命而典城也心樂
易而政悉精力先是郡歲課丁夫刺船南海餽鹽數十

萬石俗固繇力而薄產矣又重之以困擾日益窘急而
繁獄訟公之下車適遇主計集賢張公盪之乃謀所以
息民之策斥工巧占名之卒以代之故民釋重負邦事
亦簡人和於下嘉氣應之風雨以時百穀用登政有餘
力而廢墮茲緝惟虎溪浮航之道帶遶闔下鍵閉僅存
而雉堞樓櫓之制弛然莫具前所謂偏診左臂之失也
公因暇日撫睥睨而四顧則山川鬱葱之氣森然滿目
既嘆且喜其久蔽而有待乎乃命畚頽土完缺葺飭美材

籍士伍順啟塞之訓以門其下因臨觀之美以臺其上
民不瘠公不匱而厥功以成飛軒繚砌以望四野重巖
複岫周遭萬形烟顏雨態遠近異色溪流浼浼逗碧洄
清鳥聲漁唱出入杳靄君子訪境也皆絕其命名也必
古身居江海之上心存魏闕之下故臨其西樓曰望京
之樓飲醇酒者不忘於獄市褰車帷者能廣其視聽故
署其入之門曰通闡之門除道梁川而鄰國先交故標
其出之門曰彬陽之門登高懷古而舜祠在望故題其

北臺曰聞韶之臺目與心適心與境遠浩然之氣來棲
人身如躡壺中而眇物休也非守臣之賢此景孰為來
哉簷廡環合凡二十楹其形勝之遊目觀之美甲於邦
域智者創物夫豈徒然又况登陴之際民瘼可詢乘傳
而來郊勞為便亦所以輔官成而尊王命也時寶元
年正月日記

韶州真水館記

真水館者郡守田曹副郎清河張公所建也按地誌真

水出大庾嶺

字本從水從貞今朝以音犯廟諱故改為真

南與武水合二水

回曲而流故名曲江虞舜南巡奏蕭韶於羣石之右故

名其山曰韶由是州以山名縣以水名凡廣東西之通

道有三出零陵下離水者由桂州出豫章下真水者由

韶州出桂陽下武水者亦由韶州無慮之官嶠南自京

都沿汴絕淮由堰道入漕渠沂大江度梅嶺下真水至

南海之東西江者唯嶺道九十里為馬上之役餘皆篙

工楫人之勞全家坐而致萬里故之嶠南雖三道下真

水者十七八焉劉氏之自王也割韶之壤置英雄二州
壤雖減而道如故韶於嶺外為劇郡宜矣今上嗣位三
改元而得景祐其三年公自潯江郡易地而領是邦政
均而易從令約而易乂雨潤霜嚴施之有宜補墜起廢
理無遺具先是郡有二館一臨武水曰清輝一據城之
東隅曰皇華惟真水之要津則皆亭以居艤舟之次公
乃與賓佐謀曰若天子之使諸侯之賓將王命宣民風
乘舳舻由真水而至者不授以館則餽牽積饋雖厚不

得盤桓上舍優游山水間地主之禮猶為缺然由是擇境於勝相地於隙取材於羨餘取工於卒徒民不知役而功用畢東瞰真水故即水名之凡一堂一皇二室兩廡以翼于門宿息井樹具焉前構飛閣命曰仁智樂山水之趣也煙齊遠水風生白蘋欄檻千家松蘿四望真仁智之所樂也後之至者有以見清河公求瘼之外又能樂山水之嘉不獨飭厨傳以異上賓蓋將使仁智者同此樂云耳時景祐五年歲在癸韋四月日記

韶州新脩州衙記

古者諸侯宮室車服各視其命之數故臺門露寢將將
眈眈自秦人罷侯漢沿魏襲郡有守州有牧頒條詔專
生殺慮其久而固人心必三歲而易之脩職貢於天子
在千里外則遞促其期再朞而易者故州民視刺史如
路人刺史視公堂如傳舍民病尚不肯療矧肯完葺廨
宇耶韶在番禺之北去天子都城三千里而遙故為遠
官去留之心不固又可知矣皇上即位之八年以今尚

書外郎太原王君守其土下車之始綱目咸振束黠吏以繩墨制強宗以斧斤威聲一馳境內知禁然後險者傾瘡者平痼者愈魘者醒仆者起昧者明霜清物寒日和春融畏愛所交衣被黔首於是中詔得比內諸侯滿三歲後所請也政成事簡地居衝要築室卑陋人何所瞻不欲視廨舍如前人之視民病也繇是因基構程用度壯棟梁麗棖桷山有羨材不賦於民官有繕工不興其役煥諸侯之采章謹列郡之儀式挈壺所以授朔樹

戟所以示威乃伉高門以備其制分爭辨訟夙興夜寐
外皇中堂各有攸處首徇公也兔穴防姦簡書山積虎
符領兵器甲犀利對峙二庫加以層樓謹曝涼也接賢
序賓容豆舉觶則有東西小廳地暖春早百卉先媚亭
曰探芳疏池醴流一水迴合亭曰環翠射侯之亭曰百
中可以觀德也燕居之亭曰清虛可以頤神也翬飛翼
舒不僭不偏城隅一樓景最奇絕東溪北山秀在眉宇
落成之日露襲竹栢味飴顆珠圓美可愛亭曰甘露紀

嘉瑞也至於胥史分聯廩儲供上風雨之庇使葺之工
既畢民吏趨走扶伏固請镌石刻文以紀成績星飛一
介見辱嘉命謹按圖經控扼五嶺韶為交衢虞舜南巡
奏樂於此郡有遺跡因山得名漢置曲江縣為南海之
望邑晉立東衡州居湖南之屬城齊梁為始興郡置內
史以蒞之偽劉割據析其地建英雄二州故始興之名
移於他部皇朝開國軍事民政咸俾儒臣領之邕容經
畧名存實亡擬於舜韶彼則負矣屑齒江湘咽喉交廣

地之重也霜露北均疫癘南盡氣之和也霞駁萬拱雲
蒸千礎署之廣也合是數美為郡國最不亦善乎君以
天聖庚午自殿中丞領銀菟符朞年之間再增秩至屯
田員外郎則為郡之才之政為萬乘知可見矣明道元
年十一月日記

武溪集卷五

欽定四庫全書薈要卷一萬四千二百六十一

集部

武夷集卷六

宋 余靖 撰

記

潯州新城州學記

桂林之南州郡以十數潯為善地鬱江東注上無氛惡
蠻溪獠洞不際其境民之從化豈間然哉國家運期敷
佑丕冒嶺海偃革橐弓七紀于茲亦嘗詔牧守立庠序
以崇化厲賢為本而吏喜文法自進故於教育之道缺

然慶厯紀元之七禩京兆杜君應之被詔守土下車三日進謁先聖祠宮既而笏立周視見其庭堂卑隘像設墮剥冕皇服章不中程式瑚簋之制褻雜常用攝齊振衣居無容席乃喟然歎曰明經進士之科其待賢也久矣州人未嘗預太常之第者蓋教之不至也乃大相厥土而營學宮卜郭之東龜則食焉肆命從事刁君紆以董其勞鵠屋袞服正厥王禮配食從祀各列像次為堂乎東尊師教也築宮于西潔齋祀也翼以二序布為校

舍旦坐塾門人知所觀廟學既成明年仲春行釋菜之儀爵站俎房壘雲洗海丹髹矩矱一範之禮奠幣飲福仰登俯退相者肄習其容濟濟諸生袍鞞陪列終事越翌日經師執帙以正厥位聽徒就席坐立以齒出規入矩啟憤發悱州人觀者知邦君以齊魯周孔之教而為政先與夫束刑名爭尋常以圖進者異矣先是邦之秀士白玘等聚而議曰君之不訓于我而廣其黷樂育俊民俾邦其昌我不可以不贊其成願以私錢十萬佐官

之費故是役也不發帑金不誅民財而人用休息已事
俾以狀來謁記予謂杜君上以宣朝廷嚮學之意下以
成州里興賢之本能使遠邦學者異時取名爵於朝當
自今始真善教者可記也哉

洪州新置州學記

三代之制天子之學曰辟廱諸侯曰泮宮黨遂所居必
有庠序釋菜之奠其來舊矣蓋孔子之道萬世師表故
黃唐氏尊之以王爵奉之以時祀而禮用祭菜夫祭菜

之義本於太學存廟而廢學者禮之失也大江之西處
都會而山水佳者洪為率郡之造秀以文獲仕歲有人
焉固宜興學校以寵其俗景祐改元之明年天水趙槩
叔平以祠曹副郎兼東壁圖書之職來守是邦翦弊摘
蠹樹立羣善和氣被境庭無宿奸乃思本朝一祖二宗
承平八十年垂白耆老不識攻守之器今上復好文以
守成業而學校之風未甚流布殆於守臣之闕請遂露
奏豫章介在江左為支郡準的援南西二都暨上始封

之國為比即其祠宮願建黌舍詔從之繇是葺舊模新
補敗增卑廣其墻垣峻其廡陛或易椽而朽或築基而
營起橈為隆變部為豐寢殿奕奕儼然南面龍衮珠旒
備乎王章自高第弟子至漢魏大儒坐而侍壁而立于
堂于廡列像有次考室百楹以處生徒凡大夫士庶人之
子為俊士者皆許游焉仍乞上庠鏤版書以賦其時習
給閒田五百畝以充其日廩選文行之士觀察推官陳
肅撫其衆而謹其號令事由中覆咸得請焉又俾設色

之工以夏商周車服珪璧琬琰彝尊之器見於經禮者
繪之講論之堂使朝夕觀焉孟子所謂樂得英才而教
育之者其是之謂乎鳩工於三月庚子告成於八月庚
申役用卒徒不勞於民賦以羨材不歛於衆而克成焉
噫漢襲秦令以太守領郡而泮宮之制闕焉其或著理
効稱循吏大抵謹繩墨挾鈎距尚威刑以束縛人耳能
知學校為教民之本者惟文翁唱之於蜀故司馬相如
王褒之徒用文章揄揚漢美與三代相照耀於先後者

文翁之力也後人復聲而和者亡幾焉蓋學校之益人也緩威刑之取名也速故為政者有所趨焉今叔平以文學舉進士而升鼎科以器識居官途而歷顯仕復能敦大教之本儲詩書而萃英髦以尊聖育賢為事夫其遠大安可量哉與夫傲福於神盛祠廟者異矣又豈知洪人戴之不若文翁之於蜀耶某以上書忤旨貶筠州道出大府目是懿績故為之記云皇宋景祐丙子歲十月日建

饒州新建州學記

漢襲暴秦之餘治定五世乃刊著功令建郡國之學以育雋秀文翁作守巴蜀克變其風比於齊魯裒然稱為循吏之首者謹詔令善條教也國家承五朝之季剗僭難偏祖功宗德翱翔四裔今上興葺治本二紀于茲乃詔郡縣立學祥延褒博是歲都官副郎清河張君自南海倅車移守鄱陽舉遺脩要事亡不緝一日集其僚而謀曰今天子思得賢俊基固太平詔啟黌校以廣聲教

郡國當以新書從事庸副上意且古之教者以學校為
本卿佐脩之於國父老脩之於鄉旦而里父坐塾上以
視民之出暮視其入以勗怠者又師氏保氏以德行書
射共訓于民鄉之秀者移之於邑邑移於國國以聞於
天子皆學之制也善為政者固當先之矧奉天子之詔
乎先是郡先聖祠宮棟幹隳剝前守亦嘗相土而未遑
締構也君於是即其基于東湖之北偏而經營之郡之
秀民聞是謀者爭出家以助其費乃命從事之賢曰胡

宗堯屬城之良曰朱琬籍而司之得資三百五十萬於
是令畚築購梗梓利匠器程工力度堂室謹儲峙朱墨
之督一本規矩遠枕城闔取乎居國之陽傍睨湖光象
乎雍水之半嚴俎豆之習以隆乎禮正師資之位以傳
其經萃乎羣賢貫之六藝悉三代之遺則也乙酉仲夏
始庀其役越朞年而有成凡為屋百二十楹晝講夜習
各有攸居又市美田三頃以賦其日廩仍奏署屬縣宿
儒胡寧以為其表率真君子樂育英材之意也移其意

以及於天下其善豈可量哉文翁范侯不得獨擅美於前史矣

雷州新脩郡學記

三王四代質文殊迹圖治之本惟學為先閭有塾堂巷有校室矧於郡國其可廢耶本朝一祖三宗以聖繼聖夷落之外威無不聳海寓之內澤無不浸先皇帝頻詔郡縣謹貢條精里選廣生負敞黌舍講經藝崇儒術然而州邑之吏或迷於簿領或急於進取故於承流宣化

有不至者海康郡瀕海之樂郊也地域雖遠風俗頗淳

聖訓涵濡人多嚮學頒條者怠於誘導無乃上格明詔

下辜羣望乎殿省丞揭陽林君奕世儒家被服文翰既

奉休命出守是邦樂得材賢而教育之乃援前詔廣學

宮而新之相地考古必就少陽之位春秋釋菜則先聖

先師之像不可不嚴也朝夕講誦則函丈接武之堂不

可不廣也羣翔博習則居處不可不莊也勸勤黜惰則

號令不可不肅也將俾其稽古力行以孝顯其親以道

致其君不徒習威儀考聲病而已矣今天子上紹堯舜之
明內脩曾閔之行摠攬權綱旁求俊乂固應馳弓旌空
巖穴以收四方秀茂之傑益闡先王夷易之道也諸生
當體賢太守之意以副國家崇學求賢之詔也書來可
詞敢以此規嘉祐八年九月日記

康州重脩文宣王廟記

古者立學必行釋奠之禮天子諸侯皆親臨之周人祀
周公魯人祀孔子為先聖自漢已來遂採用魯禮蓋三

王之道備於周堯舜文武之道備於孔子故後世無以
易之而加崇焉孔子之教與天子正朔相左右以被四
海雖庠序廢興靡常而廟食不絕者教之存焉耳康州
在嶠南千里北人踰嶠而至者率以南方暑濕憂畏疾
瘡隕穫于內尅日月以計歸宜乎政之或未暇緝也殿
省丞李君仲求被命到郡自以壯年蒙國委用得守土
宇不復計遠邇若向之為者凡可以濟當時利後人者
罔不營度焉先是郡無黌舍纔建廟室以應令奉祠耳

廟在子城西偏廣不占畝棟幹庠陋不稱明德且郡枕
鬱江下流其源數千里其派十數以合而東每春夏積
雨流潦瀦滙浸淫毀民廬舍率走高以避江怒攜細擁
弱坐入廟下瀆慢神宇非嚴師尊教之意也廼相奭塏
去郡東五里而近得紫微宮之故基而鼎新之殿堂門
序凡五十楹先聖先師及世所謂十哲者皆扶土為像
于殿以致恭七十子而下又設色肖形于廡以存制仍
齒博士弟子之位于堂以肆經凡廟學之式參備焉既

卒工攄圖來京師以謁記屬予有出壇之役而不克書
其明年得罪為郡又明年迺閱舊訊而誌之廟之成以
慶厯癸未歲董其役者端溪尉王該進士樂其成而來
居者百餘人云

興國軍重脩文宣王廟記

孔子抗帝王之法於六經而百世宗之故其血食與學
校無窮然教之興衰存乎其時惟至治之代其道乃大
在漢四葉始建郡國之學而進儒術在唐六帝乃克用

王禮而尊夫子五代兵革雖祀典不廢羽籥絃頌之音
蓋寢矣聖宋在宥七紀于茲今上纂三聖之丕烈綜御
大器息武行文澤浸八荒常以隻日視朝雙日講學間
歲程文擢多士故天下靡然知所嚮焉郡諸侯獨大府
劇部能以營葺黌舍為請率報聞從之餘或專於督獄
賦政而未遑暇朝廷亦置之不問在其自視何如耳興
國軍者本隸武昌以摘山鼓鐵之利遂建軍壁故廟學
草創而不完景祐受冊之明年太原王君以成均博士

知軍事剛斷柔惠敷和於下剔去蠹螫民懷其生柅車
棊年簡肅成政乃謂其僚曰古之善教自學校始家塾
黨庠職在鄉老況今領縣立社以有茲土人不知學何
以示教先聖先師之祠而不若淫昏之鬼何以示德二
者皆為政所當先也惟舊祠在牙城之西風隕雨隙不
自撐梧先生弟子居無容席之地歲率常祀俯仰其間
實所病焉於是度費飭材以萃百工罷不急之用而用
之不瘡於民不割於公而需然餘力以克有成露寢爽

奕負陰嚮明龍卷玉璫顯昂其象庶陞嚴峻庭序閎廓
凡爵於唐讚於先朝作配從祀及得圖形太學者塑坐
繪立咸備其制向之不如制者悉俾新之筵開黌堂以
登師儒局列校室以來雋秀是焉者處于東偏又為二
庫藏賜書以勗生徒之業櫝禮器以謹春秋之祀是焉
者居于西偏學之稽古先乎制度乃案三代車旂器服
圖之屋壁使來者觀之煥然在前祀之有齋致其虔恭
復築齋于宮之南湖光上照山翠欲滴太虛之庭垢

慮可滌事神誨人之道備矣新宮既就而行禮其中邦人怡然知學校之所以為教也賓僚以書來俾為記將伐石而刻之以永其壽年昔魯人美僖公遵伯禽之法能脩泮宮播在詩頌蓋以能脩其宮又脩其化故國人思樂泮水而往觀之禮有飲酒養老之儀兵有受成告克之事咸在泮焉則化民成俗之道捨此宜何先哉王君能尊仲尼無窮之教宣當世所宜之治脩祠宮建學館知為政之本故不敢讓而記

惠州海豐縣新脩文宣王廟記

夫教化之本自學校始學校之興自鄉遂始周人有鄉
先生遂大夫分掌其令以謹其習而薦其賢能焉鄉校
所建則有皮弁之薦小雅之歌以享先聖先師古之道
也自秦人蠶食六國廢周之令詩書之教輕於蟣蝨漢
興雜霸學者惟集于長安郡縣之學寢微矣唐室雖欲
尊儒而不得其本春秋祭菜專為孔子祠宮已事而後
鬱生荆棘因循其弊以至于今矧今之縣令惟以斷笞

杖督賦租為稱職耳其能勸學以警俗者幾何哉吾友
譚君初命為海豐民守農畝吏守曹事闔境恬然夜亡
犬聲下車暮年政既成矣乃曰習俎豆所以敦風俗興
學校所以勵善良嚴祀事所以教肅祇考前計所以辨
制度古之建學必居公宮南之左明堂亦學也在國之
陽縣雖小亦國也子男之制其可忽哉舊有廟學處之
西偏編竹覆葵以為其宮隙雨霾風以昏其像歲二月
上丁率諸生祇其常事跼蹐庭下退與諸生謀建新廟

而崇學館諸生聞之願傾私楮以贊其成遂狀其事得請於州徙祠舍於邑之東南隅伐山斂材易葵以瓦冕服玉璫儀容大備顏子西嚮以為先師十哲坐塑以為從祀丹朱其器以薦乎牢醴堊白其堂以業乎講誦工既畢遣書請詞以識之夫素王之道猶天地之大日月之明江海之浸陰陽之變日用於百姓而不知其仁澤及於萬世而不為其私口頌目訾不加損益所以尊而奉之者教之所存焉耳今海隅遠國王化廣被夫子之

道同其汙隆興葺黌舍希風鄒魯此亦政之所存焉耳
乃書之以示於後康定二年六月日記

筠州高安縣重脩縣署記

國家以縣令專調選部用人為輕故難理之邑皆命寺
監少署丞佐之官以為之長由保任得寺省官者必之
兩川以廷謝日為次未之兩川而之他處則為權入大
江之西縣不滿五十難理者三十以風波之險獄訟之
繁人固畏之而不來其來以權入為資久者或踰年少

者三數月其闕也又三數年民之病所以痼而不瘳者其由是乎為政尚然室屋頽圯其誰顧之哉高安劇邑也籍在難理中皇上以景祐冠年之初高陽許君舉進士登甲科得秘書省校書郎試治茲邑故得久於其政君啟迪中道斷姦構窮罪之所在雖強必刈志有所守雖威不移吏畏其明而罔欺民信其令而必從滿三歲朝廷嘉其成績就增秩為廷尉平不易其地君之始至也上漏下濕不蔽風雨越二載庭無留事乃議為署以

卜攸寧取材計工皆於農隙踰年而後成民無勞焉輦
飛鳥革百堵之興一本於制度晝訪夕脩四時之居各
為其區處至於室容宴豆亭張射侯可以序賓可以觀
德古君子之事也向使踰年而去則於是署也不暴斂
以成之則隳其基必也守宰之不數易觀此可以知政
矣署既成俾予記之不敢為讓景祐五年十月日記

楚州鹽城南場公署壁記

國家循漢舊制籠山海之藏以佐經用海濱斥鹵至廣

而民食至急故歛散之權不可不專其法一緩則姦人
大賈擅之矣此所謂與奪貧富之柄也淮場負海置鹽
亭者州軍五

楚海通泰漣水也古曰直今
曰場然今尚呼亭竈直戶

轉贍桐栢以

南踰九江及荆衡之郊凡六十餘州最天下之鹽歲入
息錢三十五萬萬而淮海之鹽息錢實二十萬萬其富
國也博矣故牢盆禁地必擇官以董之自計相及其佐
及主計于外者迭舉潔廉幹濟之士以充其選然自建
元迄今殆且千稔而尚有遺利者豈廢置不常當官者

未之思乎景祐初太史吳公

遵路

漕淮南粟兼制置使公

事乃奏言楚之鹽城造鹽之場七皆售縣倉亭竈基列
相去且百里掌出納者以倉為主而不出郭郭故私煮
盜販散漫不能禁請分南五場傳海七十里命一官督
察之俾火伏可見私煮可禁天子是其議可其奏公因
舉殿直曹元素莅焉其收果溢舊數秩既滿今三司副
使張公存復舉曹君供奉以續其職曹君生貂蟬之族
而能以清勤自飭才為人知官無遺事是將復大其家

者也欲書名於署以謹其始且為他時之誌以書來請
遂記之云寶元元年十二月日記

楚州團練推官廳壁記


漢制部從事佐刺史提政綱而舒卷之其編氓勞逸羣
吏善否錢刀盈縮獄犴邪正無慮朱出墨入咸得婉美
其畫白府而損益焉有唐天寶之後宿兵四郊分建元
戎以屏王室大者擁旄而制數郡其次持節而顯一州
各立監佐輔其條教然郡曹掾不得聞軍謀軍尉於民

事亦如之。兼而贊者必求文雅之士，為其上賓。故參謀幕府，必使名而命之。山陽、楚之東都，北繚、淮東、負海、漕渠，貫中、天下、輻輳者，半四達用武之國，南走廣陵，為大府，故持節者不得制旁郡團練之名，得於此矣。皇朝命文吏領州將，懲諸侯之專也。賓佐之任，委於選部，累資計考，不由辟召，而主禮輕矣。先是團練推官受署之館，位得其表，接賓客，分曹局，列厨廡，容妻子，各有攸處。前居是官者，才譴而權不足，郡都尉緣隙而豪奪之，徙居

河亭才庇風雨近市而囂焚巢而危孰謂官庭返隘民
舍枝梧湫底何以觀政蘭陵蕭君江左之秀由進士擢
第再命而佐楚會某人為太守仁賢協贊綱領克振民
得和氣軍無怨聲議政之暇謀及居室乃根源前事上
白廷中願遷爽塏以正民之瞻視詔可其奏乃擇地於
子城之東南隅出帑金市山材興卒徒利工器一毫不
取於民間費府緡若干萬考室若干上棟下宇可以避
燥濕高閤厚垣可以卜清曠噫世之處官局者苟非因

循卑陋則興役動衆疲勞下民矣今蕭君革因循之弊
絕罷勞之役而安厥居愈見其兼濟之能也異時享大
名器佐王之國則觀其佐東諸侯之政斯得之矣若乃
淩枕輪奐亭圃嘉美本無意於華侈故畧之明道二年
五月日記

武溪集卷六



總校官庶吉士 臣 張能照

校對官編修 臣 方 煒

謄錄監生 臣 倪時慶